

Komunikadu Imprensa

24 Fevereiru 2021

JSMP realiza ona treinamentu kona-ba prosesu formál no prevensaun violénsia bazeia ba jéneru ba KPK no OPS iha Munisípiu 4

JSMP durante fulan Dezembru 2020 to'o Fevereiru 2021 realiza ona treinamentu ba iha Ofisiál Polísia Komunitáriu (OPS) no Konsellu Polisiamentu Komunitáriu (KPK) ho tópiku "Pápel KPK no OPS iha Prevensaun Violénsia Bazeia ba Jéneru". Treinamentu ne'e kobre ona munisípiu hamutuk 4 kompostu husi munisípiu Manatutu, Bobonaro, Ermera inklui iha Aileu ho totál partisipante OPS hamutuk 80 no KPK hamutuk 44.

Iha treinamentu ho durasaun loron ida ba kada treinamentu ne'e espesífiku fahe ba sesaun haat (4), sesaun dahuluk kona-ba konseitu krime ne'ebé koa'lia liu kona-ba saida mak krime, dolu nia tipu, responsabilidade kriminál, natureza krime no ajente sira iha krime, preskrisaun ba keixa no pena. Iha sesaun kona-ba prosesu justisa formál ne'ebé refere liu ba prosesu inkérITU, julgamentu, rekursu no aplikasaun pena. Entretantu, iha sesaun datoluk kona-ba violénsia bazeia ba jéneru ne'ebé refere liu ba iha konseitu no asaun iha violénsia bazeia ba jéneru, enkuadramentu legál iha violénsia bazeia ba jéneru, konseitu violénsia doméstika no mós ligasaun ho violénsia bazeia ba jéneru. Iha sesaun dala ikus maka ko'alía kona-ba papél OPS no KPK ba iha prevensaun no kombate krime liului iha violénsia bazeia ba jéneru.

Iha treinamentu ne'e, fasilitadór sira responde no klarifika pergunta sira husi partisipante sira ne'ebé kestiona liu kona-ba tipu krime sira ne'ebé sira bele rezolve no taka liului razaun tanbasá krime ho natureza violénsia doméstika la bele taka. Aleinde ne'e, polísia OPS sira mós husu mezmu krime públiku la bele taka maibé oinsá sé entre suspeitu ho vítima hakarak atu rezolve sira nia problema liuhusi justisa tradisionál no saida mak sira sei halo bainhira suspeitu sira iha krime rumá lakohi atu ko'alía ho loloos ba kualkér sira nia asaun durante investigasaun. Pergunta no preukupasaun sira ne'e fasilitadór sira responde no klarifika kedes.

"Treinamentu ne'e pertinente tanba bele responde kedes sira nia dúvida no pergunta sira nune'e bele hasa'e sira nia koñesimentu kona-ba prosedimentu kriminál liului diferença entre krime públiku no semi públiku no sira nia papél iha prevensaun violénsia bazeia ba jéneru", dehan Direitora Ezekutiva JSMP, Ana Paula Marçal.

Durante treinamentu JSMP observa liu husi avaliaasaun ba iha formuláriu antes treinamentu no depoisde treinamentu katak, participante barak konkorda katak iha kazu hotu, KPK ka OPS bele konkorda ho vítima bainhira sira hakarak rezolve deit iha família ka taka tiha prosesu, maibé depoisde treinamentu muda duni numérú resposta ne'ebé loos ba pergunta refere.

Ikus bainhira treinamentu ne'e remata, participante sira sujere ba iha JSMP atu kontinua fó treinamentu hanesan ne'e ba iha OPS hotu tanba konsidera matéria iha treinamentu ne'e pertinente no ajuda tebes sira nia serbisu. Parte seluk, maioria Komandante iha Munisípiu haat ne'e sujere atu JSMP bele realiza tan treinamentu ho tópiku hanesan ba iha KPK no OPS sira seluk inklui atu haklean liu tan matéria ba iha participante sira antes ho durasaun tempu naruk uitoan tanba loron ida deit la suficiente hodi kumpriende klean tópiku sira ne'ebé mak kobre iha treinamentu. Alende ne'e, sira mós rekomenda atu fó treinamentu hanesan ba iha ajente Xefe PNTL nian atu sira mós bele iha kumprensaun hanesan nune'e bainhira fó orden tuir duni lei.

Programa ida ne'e finánsia husi Embaixada Nova Zelandia iha Timor Leste liuhusi The Asia Foundation (TAF) Programa Apoiu Polisiamentu Komunitáriu (PAPK). Treinamentu hanesan tuir planu sei realiza iha Munisípiu Manufahi ba estrutura KPK.

Atu hetan informasaun kompletu, favór kontaktu:

Ana Paula Marçal
Diretora Ezekutiva JSMP
Email: ana@jsmp.tl
Telefóne: 3323883 | 77040735
Website: <http://jsmp.tl>